

Dijelovi intervjeta visokog predstavnika za agenciju Fena kojim se obilježava druga godišnjica mandata Pedijsa Ešdauna kao visokog predstavnika

Govoreći o rezultatima ostvarenim u protekle dvije godine od njegovog preuzimanja dužnosti visokog predstavnika, Ashdown je naveo kako su u položeni temelji za uspostavu države po evropskom modelu koja je na putu za članstvo u evropske i evoatlantske institucije.

Paddy Ashdown: BiH je u ovom periodu otvorila vrata koja vode iz faze Dejtona u fazu Evrope. Ali, u godini koja je pred nama moramo shvatiti kakva nam se prilika pruža kako bismo do kraja godine uspjeli da se približimo porodici evropskih država, izjavio je visoki predstavnik.

Pojasnio je da je, ukoliko se BiH ove godine bude mogla priključiti procesu stabilizacije i pridruživanja i Partnerstvu za mir, njen put ka državnosti i Evropi u mnogim najvažnijim aspektima nepovratan.

Govoreći o ključnim uspjesima za vrijeme njegovog dosadašnjeg mandata, visoki predstavnik na prvo mjesto stavlja reformu pravosudnog sistema. Sud BiH je otvoren na vrijeme u januaru 2003. i od tada je proveo 202 istrage, podignuo 39 optužnica protiv 164 osobe, te donio 46 presuda o krivici. Među njima se nalaze ljudi koji su bili najmoćniji u državi i Sud je time dokazao da se ni oni koji su na visokom nivou krivi za

kriminal i korupciju ne mogu sakriti.

Visoki predstavnik navodi i kako se na nižem nivou pravosuđa stanje stalno poboljšava, te je izrazio uvjerenje da će reforma pravosuđa u sljedećih nekoliko godina donijeti pravu pravdu u BiH.

Druga ključna stvar je, prema njegovom mišljenju, uspostava Uprave za indirektno oporezivanje. Država mora, kako je kazao, imati odgovarajući porezni sistem na cijeloj svojoj teritoriji i na izgradnji toga se počelo raditi. To znači da ne samo da će postojati odgovarajući sistem za finansiranje države nego i da će se zatvoriti vrata za ogromnu korupciju.

Treći uspjeh, prema ocjeni visokog predstavnika, su amandmani koje su donijeli organi vlasti BiH kako bi oružane snage BiH bile uspostavljene na državnom nivou.

Paddy Ashdown: Ta tri koraka pokazuju da BiH sada izlazi iz faze Dejtona, a ulazi u fazu Brisela. U sljedećoj godini ćete vidjeti da se taj trend nastavlja i ubrzava, kazao je Ashdown.

On dodaje kako će Evropa formalno preuzeti vodeću ulogu kada EUFOR preuzme misiju od SFOR-a i kada će njegova uloga specijalnog predstavnika EU-a postati važnija, a uloga visokog predstavnika manje važna.

Paddy Ashdown: I dalje ću zadržati taj dvostruki mandat, ali je veoma vjerovatno da ću u sljedećih godinu dana ili prije treće godišnjice mogu rada biti više specijalni predstavnik EU-a, nego visoki predstavnik, istaknuo je Ashdown, dodajući kako će to ipak zavisiti koliko brzo organi BiH budu radili na reformama.

Naveo je kako će se odnos između međunarodne zajednice i bh. vlasti i sam početi da mijenja kako BiH bude čvrsto i nepokolebljivo ulazila u glavne tokove evropskih i

evroatlantskih institucija.

Ashdown je istaknuo i značaj provođenja ekonomskih reformi, za koje je kazao da treba vremena i da razumijem nestrpljivost ljudi kada očekuju radna mjesta. Ne možete reformirati ekonomiju i odmah dobiti radna mjesta i investicije, kazao je on.

Upozorio je da ukoliko sada ne provedemo reforme, koje uključuju proces privatizacije, liberalizaciju tržišta, posebno tržišta rada, zakone o stečaju, uklanjanje nepotrebnih propisa koji sprječavaju otvaranje radnih mjesta, reforme u okviru procesa Buldožer komisije, nećemo imati radna mjesta u budućnosti.